

Kematian dan kebangkitan Lazarus

Petikan dari Kitab Injil: [Yahya 11:1-46](#).

¹Pada suatu ketika, seorang lelaki bernama Lazarus jatuh sakit. Dia tinggal di Baitani bersama dua orang saudara perempuannya bernama Maryam dan Marta. ²Maryamlah, yang saudaranya Lazarus sedang sakit, merupakan seorang perempuan yang dahulu pernah menuangkan minyak wangi ke kaki Junjungan dan menyapunya dengan rambutnya. ³Kedua-dua beradik perempuan itu mengirim khabar kepada Isa, 'Junjungan, dia yang Kaukasih itu sakit.'

⁴Apabila menerima berita itu, Isa berkata, 'Sakit Lazarus tidak akan membawa maut. Hal ini berlaku untuk memuliakan Allah. Disebabkan kejadian ini Putera Allah akan dimuliakan.' ⁵Isa mengasihi Marta, Maryam dan Lazarus. ⁶Tetapi apabila Dia mendapat berita Lazarus sakit, Dia sengaja tinggal di tempat itu dua hari lagi.

⁷Kemudian Dia berkata kepada para pengikut-Nya, 'Marilah kita pulang ke Yudea.'

⁸Para pengikut-Nya menjawab, 'Tuan Guru, bukankah orang Yahudi di situ baru saja hendak merejam-Mu? Sekarang Engkau hendak pulang ke situ?'

⁹Isa berkata, 'Bukankah waktu siang dua belas jam lamanya? Orang yang berjalan pada waktu siang tidak akan tersandung kakinya, kerana masih ada cahaya di dunia ini. ¹⁰Tetapi jika dia berjalan pada waktu malam, kakinya akan tersandung kerana sudah tiada cahaya lagi.'

¹¹Kemudian Isa menambah, 'Sahabat kita Lazarus sedang tidur. Aku akan pergi membangunkannya.'

¹²Para pengikut Isa berkata, 'Junjungan, sekiranya Lazarus tidur, dia akan sembuh.' ¹³Yang dimaksudkan oleh Isa ialah Lazarus sudah meninggal dunia, tetapi para pengikut-Nya mengambil erti tidur yang biasa.

¹⁴Oleh itu, Isa berkata kepada mereka dengan jelas, 'Lazarus sudah meninggal.

¹⁵Tetapi, untuk kebaikanmu, Aku bersyukur Aku tidak bersamanya ketika itu. Dengan demikian kamu akan percaya kepada-Ku. Marilah kita pergi kepadanya.'

¹⁶Tomas yang disebut Didimus berkata kepada pengikut Isa yang lain. 'Ya, marilah kita pergi juga supaya kita mati bersama-Nya!'

¹⁷Ketika Isa sampai, Dia mendapati Lazarus sudah empat hari di dalam makam.

¹⁸Baitani terletak kira-kira dua batu daripada Baitulmaqdis. ¹⁹Oleh itu ramai orang Yahudi datang melawat Maryam dan Marta untuk melipurkan hati mereka yang duka kerana kematian Lazarus. ²⁰Apabila Marta mendengar Isa datang, dia terus pergi untuk menyambut-Nya, manakala Maryam tinggal di rumah.

²¹Marta berkata kepada Isa, 'Ya Junjungan, kalaulah Junjungan ada di sini pada waktu itu, tentu saudaraku masih hidup! ²²Aku tahu, sekarang pun apa saja permintaan Junjungan akan dikabulkan Allah.'

²³Isa berkata kepada Marta, 'Saudaramu akan hidup kembali.'

²⁴Marta menjawab, 'Aku tahu Lazarus akan hidup kembali pada hari akhir.'

²⁵Isa berkata kepada Marta, 'Akulah kebangkitan dan hidup. Sesiapa yang percaya kepada-Ku akan hidup, meskipun dia sudah mati. ²⁶Orang hidup yang percaya kepada-Ku tidak akan mati selama-lamanya. Percayakah kamu?'

²⁷Marta menjawab, 'Ya Junjungan, aku percaya bahawa Junjungan adalah al-Masih, Putera Allah, yang diutus oleh Allah, dan yang akan datang ke dunia ini.'

²⁸Setelah itu, Marta pergi memanggil saudaranya Maryam dan berbisik kepadanya, 'Guru ada di sini. Dia memanggilmu.' ²⁹Maryam pun segera bangun lalu pergi untuk berjumpa Isa. ³⁰(Pada waktu itu Isa belum sampai di kampung mereka. Dia masih di tempat Marta menyambut-Nya.) ³¹Apabila orang Yahudi yang ada di rumah Maryam untuk melipurkan hatinya itu melihat dia segera bangun lalu keluar, mereka pun mengikutnya kerana menyangka dia hendak ke makam Lazarus untuk menangisinya.

³²Setelah Maryam melihat Isa, dia berlutut di kaki-Nya lalu berkata, 'Junjungan, kalaulah Engkau ada di sini pada waktu itu, tentu saudaraku masih hidup!'

³³Ketika melihat Maryam menangis dan semua orang Yahudi yang bersamanya, turut mengalirkan air mata, Isa sungguh hiba dan terharu. ³⁴Dia bertanya kepada mereka, 'Di manakah kamu letakkan dia?'

Mereka menjawab, 'Marilah lihat, Ya Junjungan.'

³⁵Isa menangis.

³⁶Semua orang Yahudi yang hadir berkata, 'Lihatlah! Dia sungguh kasih akan Lazarus.'

³⁷Namun, ada yang berkata, 'Dia dapat mencelikkan orang buta. Tidakkah Dia dapat mengelakkan kematian Lazarus?'

³⁸Isa yang masih terharu pergi ke makam Lazarus, iaitu sebuah gua yang ditutup dengan batu besar. ³⁹Isa berkata, 'Alihkan batu itu.'

Tetapi Marta berkata, 'Junjungan, sudah empat hari dia dimakamkan, tentu berbau.'

⁴⁰Isa berkata kepada Marta, 'Bukankah sudah Kukatakan kepadamu, kalau kamu percaya, kamu dapat melihat kemuliaan Allah?'

⁴¹Mereka mengalihkan batu itu. Isa menengadah ke langit lalu berkata, 'Ya Bapa, Aku bersyukur kepada-Mu kerana Engkau mendengar permintaan-Ku.

⁴²Aku tahu Engkau memang sentiasa mendengar permintaan-Ku. Aku menyebutnya untuk kebaikan semua orang di sini, supaya mereka percaya Engkau mengutus-Ku.'

⁴³Selepas itu, Isa berseru lantang, 'Lazarus, keluar!' ⁴⁴Lazarus pun keluar. Tangan dan kakinya masih berbalut kain kafan, mukanya masih dilitupi kain penutup muka.

Isa berkata kepada orang ramai di situ, 'Lucutkan kain kafannya dan lepaskan dia.'

⁴⁵Sebilangan besar orang yang datang melawat Maryam dan melihat apa yang dilakukan oleh Isa terus percaya kepada-Nya. ⁴⁶Namun, ada yang pulang mendapatkan orang Farisi dan melaporkan hal itu.